


# EPISTOLA PASTORALIS

A D


CLERUM, ET POPULUM  
ECCLESIAE MANTUANÆ.



MANTUÆ, MDCCLXX.

---

Typis Hæredis Alberti Pazzoni, Regio-Ducalis  
Typographi.





JOANNES BAPTISTA

S. R. I. COMES DE PERGEN

DEI, ET APOSTOLICÆ SEDIS GRATIA

SANCTÆ CATHEDRALIS ECCLESIAE MANTUANÆ

EPISCOPUS

SANCTÆ CATHEDRALIS ECCLESIAE OLOMUCENSIS

CANONICUS CAPITULARIS.

*Venerabilibus Fratribus, & Dilectis Filiis Capitulo, & Canonicis ejusdem  
Sanctæ Mantuanae Ecclesiæ Parochis, utrique Clero, Sanctimonialibus,  
universoque Populo Civitatis, ac Diœcesis Mantuanae,*

SALUTEM IN DOMINO.



Emo ex Christi Fidelibus dubitavit unquam  
Episcopos esse eos, quos Spiritus Sanctus  
posuit regere Ecclesiam Dei, sive,  
ut ait Tridentina Synodus, Episcopos  
successores esse Apostolorum, quos una  
cum Prophetis fundamentum novimus, super  
quod superædificati sunt Cives Sanctorum, & Domestici  
Dei ipso summo angulari Lapide Christo Jesu.  
Quapropter merito utique eam partem Ecclesiastici regiminis,  
in cujus sollicitudinem à Summo Sacerdote Ecclesiasticæ  
Hierarchiæ Quivis ex illis designatus existit,

stit, adeò sibi Cordi habeat necesse est, ut nil altius sibi mente repositum sciat; idque ita esse, omnibus præcipuè verò Ovibus sibi à Deo concreditis palam demonstrat.

Non novum igitur, nec temerarium in me reperietis Vos omnes quotquot de Ovili meo esse volueritis, si quod Conscientiæ meæ adeò seriò impositum esse audistis, hilari, promptoque animo hæc meâ Encyclicâ, sive Pastoralis Epistola pro viribus contestari aggredior; Non enim aliundè, quam per Portam vocationis ut Aaron in hoc Ovile me intrâsse suspicabimini utiquè, dùm licèt absque ullis meis meritis, omni tamen eò suffultum Titulò, me Vobis palàm sisto, quo, & vobis, & mihi sperare licet, non alienâ hominis nequam, sed Dei voluntate me esse, quem me esse dico, Episcopum videlicet Vestrum, & Pastorem in his, quæ Fidem, moresque Animarum vestrarum spectant.

Estote ergò fortes in Fide; in Fide inquàm Christi Jesu, in quâ nati estis, Romana videlicèt, Christiana, Catholica, Apostolica: Fortes dico in ea estote, non quidem quia in eâ nati estis, sed quia eam Ipse, Deus verax vobis revelare dignatus est, imò eam Vobis evidenter credibilem, proindèque, si eidem placere vultis, indispensabiliter credendam proponit per infallibilem in Dogmate, ac moribus Ecclesiam, Sponsamque suam, lucernam illam in Monte positam, præ cæteris omnibus splendentem, atque visibilem; Visibilem inquàm in eò saltem quod ea sola una sit in unitate Universalis Primatis, sive Summi Pontificis, Successoris D. Petri, Vicarii in Terris Christi Jesu; Sola Sancta in Sanctitate Doctrinæ, & Legis, eorumque omnium, quos innumeros in hanc

ul-

usque diem Sanctos, Beatosque progenerat; Sola Catholica in immutabili uniformitate omnium, quæ per Universum Orbem proponit credendorum Fidei Articulorum; Tùm tamdèm sola Apostolica in continua ab Apostolorum Principe in hodiernam diem Romanorum Episcoporum Successione.

Hanc igitur tanquàm unicè veram, unicè salvificam Fidem cautè custodire, firmitèrque ad mortem usque tenere vos præprimis admonitos cupio; nihil abindè dementes, nihil eidemaddentes; nec eam fors ab iis mensurantes, quæ solam externam disciplinam spectare dignoscuntur; hæc enim quemadmodum pro communi indigentia quovis tempore mutationi obnoxia esse constat, ità nihil commune habere possunt cum Fide, de quâ loquor vestra, utpotè quæ Fides est Ecclesiæ Dei, quam super vivâ Petrà Christi Jesu fundatam, ac proindè immutabilem esse novimus, cuique, Teste Deo, quocumque etiam procellæ tempore firmitèr persistere datum est, adeò quidem, ut nec ipsæ portæ Inferi eidem prævalituræ sint, nèc contra eam unquam prævalere valeant.

Si verò vos firmos cupio in Fide, quæ Sperandarum est substantia rerum, non debiliores sanè vos esse rogo in eâ, quâ Spe vivimus in Deum Patrem misericordem, fidelem, ac potentem, per infinita merita Jesu Christi Salvatoris nostri; Hæc enim est fiducia illa, quæ non confundit, cuique innitur patientiæ Virtus, quæ nobis adeò necessaria est, ut reportemus promissionem vitæ Æternæ; nec vos abindè fors abstrahat terror Conscientiæ vestræ; tanta enim est ejusdem misericordia, tantaque apud Eum redemptio, ut omnibus jubeat dici in nationibus, quod nullus unquam speravit in Eum, & confusus est; quæ quidèm omnia  
non

non propterea dicta esse volo, ut liberiùs peccare possitis, sed ut in peccata quæcumque prolapsi illicò animum vestrum in Deum Patrem erigatis, recordantes apud eum Advocatum habere Christum Jesum, qui intercedat pro vobis, nolens mortem peccatoris, sed ut magis convertatur, & vivat.

Firmatis autem jam iterùm, iterùmque mox dictis præcipuarum Virtutum fundamentis, non erit utiquè, quod vos alliciam ad amandum Eum, quem Deum verum, summèque veracem, fidelem, potentem, ac misericordem audistis, verbo ad amandum Eum, quem Summum Bonum Cæli, & Terræ esse creditis; diligite Eum itaque, vel saltem petite, & desiderate Eum diligere super omnia ex toto corde, ex totà animà, & ex totà mente vestrà, non solùm autem linguà, verùm & opere; adimplentes nimirùm Legem Ejus, pietatemque colentes, quæ ad omnia utilis est, promissionem habens vitæ, quæ nunc est, & futuræ; utentes quidem hoc Sæculo, sed tanquam non utentes, præterit enim figura hujus Mundi; diligentes Eum quoque in proximis vestris, amicis, sive inimicis, orantes pro se invicem, multum enim apud Deum valet Oratio Justi assidua; neminem offendentes, aut judicantes, aut vituperantes, sed alter alterius onera portantes, honorem dantes, cui honorem, tributum, cui tributum, obediens Præpositis vestris, Deumque sine intermissione implorantes, ut quos vobis misericors Deus dedit piissimos Principes, qui vos pro Eorum Supremâ Legislativâ Potestate in pace, & tranquillitate publicâ, tantâ Religione, ac Clementia rectè gubernant, Eosdem vobis, ac generationibus vestris in ævum tales conservet; quemadmodum paritèr Deum continuò orantes, ut Quibus Animas, moresque Ani-

marum vestrarum confidere dignatus est, in spiritu, & veritate ità proficiant, ut rectè vos doceant, & instruant, adeò, ut non modò neminem ex vobis perdant, ac seducant, verùm quotquot Illis consignati estis, tot in die illa villicationis salvos, & innocuos Salvatori Nostro Jesu Christo pro æterna vobis impertienda gloria, coronaque Justitiæ intrepidè parati sint reddere.

Hæc dum vos omnes æqualitèr tangunt Oves meæ, quæ vocem meam audire vultis, pauculùm modo ad Vos specialiter me converto, Insigne hujus Cathedralis Capitulum, caterosque omnes, qui de utriusque Sexus Clero estis, sive Seculari, sive Regulari, de Regali Sacerdotio, de Populo electo Dei, præcipuè qui ad colendam Vineam Domini, Curam nempe animarum præceteris selecti, ac vocati estis; Ad Vos igitur Corona mea, Gaudium meum, verba mea nunc dirigo; commonens Unumquemque Vestrum, ut sedulò reflectatis, quod quemadmodum plùs aliis talentorum accepistis, ità, & major de his ratio à Vobis in illa die exposcetur, ubi à Deo ipso judicabimini, qui non irridetur, qui novit corda vestra, Quique non est personarum acceptator.

Satagite igitur, ut certam vestram Vocationem faciatis in castitate, paupertate, & obedientia, in charitate, & humilitate, in mansuetudine, & lenitate spiritus, sine æmulatione, sive Cephæ quis fuerit, sive Pauli, sed in uno, eodemque spiritu ambulantes, scientes omnes nos membra esse Unius Corporis Jesu Christi.

Cavete maximè à scandalis pusillorum vestrorum confortari in Verbo Dei, Qui dum signum dilectionis vestræ in Ovibus suis rectè pascendis reponit, vicissim vobis pignus præbet irrevocabile dilectionis suæ; qui enim diligit Deum diligitur ab eo.

Otium

Otium fugite, Vincam Domini indefessè colentes, hilarique animo dantes, & agentes quidcumque Cura hæc vestra in bonum proximi vestri, in quo semper Deum conspicitis, ac colitis, exigere unquam poterit, sive de die, sive de nocte, tum in fractione panis, quod idem est, ac fideli expositione Verbi Dei per sanas Conciones, ac Cathéchismos, sive Cristianas Doctrinas tum in veræ pietatis, bonorumque morum exemplo, tum in conciliando frequenti Pœnitentiæ, ac Eucharistiæ Sacramentorum usu, tum in rectâ, populoque vestro commodâ horarum distributione in iis, quæ Officium Divinum, maximè vero Missas, ac Verbum Dei audiendum spectant, tum in indefessa Infirmorum, ac præcipuè Moribundorum discretâ assistentiâ, tandemque in assidua, eâque mansueta, ac suavi pœnitentium excipienda Confessione, aliorumque Sacramentorum decenti administratione.

Verbo dicam: Sint lumbi vestri castitate præcincti, & opera vestra præ bonitate luceant, tamquàm lucernæ ardentes in manibus vestris; neutrum porro à vobis pro honestate tantum hujus mundi fiat, aut præmio, minus, ut ab hominibus videamini, sed ad utrumque amore Dei properate pro pondere, & mensura status vestri certâ spe æternæ remunerationis, cupientes, ut omnes, qui vident opera vestra bona in terris, unâ vobiscum glorificent Patrem vestrum qui in Cælis est, Deum verum unum, & trinum, Deum Patrem, Deum Filium, & Deum Spiritum Sanctum, qui Vos benedicat, & custodiat. Amen.

Datum Mantuæ ex Episcopali nostro Palatio die 13. Maji 1770.